


ANGAYUBAGIA

WENTEN

KRIK KRIK

SANE BECIK



I Nyoman Agus Sudipta

**ANGAYUBAGIA WÉNTEN KRIK KRIK
SANÉ BECIK**

**Katulis olih
I Nyoman Agus Sudipta**

**Balai Bahasa Provinsi Bali
2021**

ANGAYUBAGIA WÉNTEN KRIK KRIK SANÉ BECIK

Penulis : I Nyoman Agus Sudipta
Penyunting :
Ilustrator : Gede Lingga Ananta Kusuma, S.Sn.,M.Sn
Penata Letak : I Nyoman Agus Sudipta

Katerbitang warsa 2021

Olih Balai Bahasa Provinsi Bali

Jalan Trengguli I No. 34 Denpasar Timur

Telepon (0361) 461714

(www.balaibahasaprovinsibali.kemendikbud.go.id)

Pamahbah

Asung kerta wara nugraha Ida Sang Hyang Widhi Wasa, santukan pasuécan Ida, prasida buku satua puniki kapuputang. Buku satua puniki maosang panyamaan sareng kalih, punika Beli Dédé sareng Ana. Kacrita, Ana mikolihang pikobet (*problem solving*), santukan tas sekolahné kabolongin olih I Binik. Raris Ana masemaya jagi setata apik. Ana taler jagi malajah mupulang jinah, anggéna numbas tas sekolah sané anyar. Beli Dédé lan bapanné nulungin Ana ngulah I Binik sané jail. Angayubagia wénten I Krik Krik sané becik nulungin ngulah I Binik. Ring buku satua puniki madaging *nilai religius, kejujuran, toleransi, kedisiplinan, bekerja keras, kreatif, mandiri, demokratis, rasa ingin tahu, gemar membaca, peduli lingkungan, peduli sosial lan bertanggung jawab*.

Buku satua puniki taler madaging lengkara anggén nundunin papineh mangda *berpikir kritis*. Papineh sané *kritis* punika ngindikang *kecakapan Abad-21*. Papineh sané kritis taler nglatih *Ketrampilan Berpikir Aras Tinggi (KBAT)* mangda alit-alité nénten ngwacén buku kémanten, nanging prasida ngrereh pamargi sané becik lan patut tur sayan kadaut ring daging satua ring buku puniki. Dumugi buku satua puniki sida maguna anggén nglestariang basa Bali mangda sayan nglimbak lan buku satua puniki dados *bahan literasi* sané masikian sareng *pembelajaran berbasis KBAT* ring Satuan Pendidikan Dasar.

Karangasem, Nopember 2021
Penulis,

**Ana ngeling. Tas sekolahné bolong. Ana paékiná
ajak méménné. Ana ngédéngang tas sekolahné ané
bolong. Méménné ngelut ulian sayangné.**

**”Napi sané ngawinang tas sekolahné, Ana bolong,
nggih?”**



Méménné mréksa tas sekolahné Ana.

Di tengah tasé begeh ada sisan jaja. Tepukina tampakné I Binik ané jail di méja belajaré. I Binik ané ngranayang tasné Ana bolong.

Binik ento bikul cenik. I Binik demen pesan tongos ané kumel.



Méménné nuturin Ana.

”Ana jegég, patutné setata apik. Sisan ajengan patutné entungang ring genah luu.”

Ana manggutan lan majanji laku setata apik.



Beli Dédé maekin Ana.

”Kenapi tas sekolahé, Ana?”

”Bolongina sareng I Binik sané jail, Beli Dédé.”

”Sampunang sebet! Beli madué tas sasepelan nika dumun anggén.”

”Inggih, Beli, matur suksma.”



Ana lega pesan baanga tas ajak belinné.


Ana jani lakar malajah nambunang pipis.

Ana lakar meli tas anyar. Malajah nambunang pipis
ento melah pesan.

”Ngiring, saking mangkin malajah mupulang jinah!
Jemet mupulang jinah, napi kabecikané?”



Bapanné nawang, Ana ituni semengan ngeling.
Bapanné lakar nyebag I Binik. Beli Dédé lan Ana
nulungin bapanné masang jebag.
"Manut ring alit-alité, napi I Binik jagi keni jebag?"



Semengan, Beli Dédé mréksa jebagé.

Ditu tingalina jebagé puyung. Beli Dédé morahan
ajak bapanné.

”Napi sané ngawinang, I Binik nénten keni jebag,
nggih?”




Beli Dédé ngalih *informasi* di internét. I Binik tusing kena jebag, krana jebagé tondén umbahina. Bon enech lan tain bikulé enu adeka ajak I Binik. Jebagé patut umbahin nganggo sabun apang kedas. Beli Dédé, buin ngalih *informasi* apang aluh ngulah bikul.

”Napi sané jagi anggéna sareng Beli Dédé, nggih?”



Petengné, beli Dédé ajak bapanné suba sayaga.
Bapanné suba ngaba sénter. Beli Dédé ngaba toplés
lad anggonna wadah jaja. Toplésé suba umbahina.
Tekep toplésé suba kabolongin.
"Napi sané jagi kalaksanayang I bapa sareng beli
Dédé, nggih?"



Ajaka dadua lantasi ka tegal, di durin umahné.
Pajalanné adéng pesan. Uling joh, kadingehang
suara ngecik.

”Krik krik krik”

Bapanné ningalin ané masuara ngecik ento.

”Napi sané kacingakin olih bapanné beli Dédé,
nggih?”



Cacep pesan, bapanné nakep beburoné ento.

”Kep....!” Bapanné nakep jangkrik.

”Beli Dédé, gelisin mriki bakta toplésé.”

”Niki,... Bapa!”

Bapanné nyelejang krik-krik ka tengah toplésé.

Lantas krik-krik abana mulih.

”Manut ring alit-alité, krik-krik jagi anggéna napi,
nggih?”



Bapanné ajak beli Dédé suba neked di umahné,
lantas ngumbahin lima. Krik-krik ané di toplésé
pejanga di duur méja belajarné Ana. Méménné lan
Ana teka maekin. Ana lantas matakon.
"Beli Dédé, anggén napi krik-krik ka genahang
irika?"



”Krik-krik puniki, jagi anggén ngulah I Binik.”

”Punapi carané, Beli Dédé?”

”Krik-krik ngamedalang suara *ultrasonik* sané nénten kasenengin sareng I Binik.”

”Napi punika suara *ultrasonik*, Beli Dédé?”

”Suara sané *frekuensi*-né ageng.”

”Sapunapi krik-krik masuara, napi pateh kadi kedis?”



”Krik-krik ngamedalang suara saking kapidné.
Wantah krik-krik muani sané ngamedalang suara.
Tatujoné anggéna ngéréd luané. Tatkala masan
panes, kapid krik-krik sayan becat makosod.
Wénten *réaksi kimia* ring awakné krik-krik.”

”Matur suksma, Beli Dédé.”

Lantas krik-krik ngecik.

”Krik krik krik”



Beli Dédé ajak Ana ninghang krik-krik ngecik sambilanga makenyem.

”Sampun wengi, ngiring sirep dumun.” Méménné ngorahin pianakné.

”Inggih, Mé...! Ngiring sirep, Beli.”

Ajaka dadua lantasi ka kamarné. Satondén masaré, beli Dédé lan Ana nguncarang puja.



Semengan, Ana suba bangun lantasi magimpes di kamarné. Ana magegison ka méja belajarné. Tusing buin tepukina tampakné I Binik. Angayubagia, I Krik Krik suba nyidaang ngulah I Binik. Beli Dédé lan Ana lantasi ngelébang I Krik Krik.



Teka uling sekolah, Ana ningalin célénganné. Célénganné ento lantás kabelahang. Céléngan Ana suba begeh misi pipis. Ana ngidih tulung apang atehanga ka toko tas. Ana lantás meli tas anyar. "Élingang, jemet mupulang jinah, akéh ngamolihang sané melah!"





*****PUPUT*****



